

Caibidil 1

RÁITEAS ÓN GCATHAOIRLEACH
AGUS ATHBHREITHNIÚ AN
PHRÍOMHFHEIDHMEANNAIGH

RÁITEAS AN CHATHAOIRLIGH

Réamhrá

Is í seo an séú Tuarascáil Bhliantúil déag de chuid ÚMICÉ ('an tÚdarás'). Is cúis áthais dom í a chur faoi bhráid an Aire Fiontar, Trádála agus Fostaíochta, de réir alt 928(1) d'Acht na gCuideachtaí, 2014 ('an tAcht'). In Athbhreithniú an Phríomhfheidhmeannaigh, déantar achoimre ar na príomhghníomhaíochtaí a rinne an tÚdarás le linn 2021 chun a mhisean a chomhlíonadh. Sa chuid eile den Tuarascáil seo, tugtar mionsonraí ar an obair sin. Sa Ráiteas uaim, ba mhaith liom díriú ar na gnéithe straitéiseacha arb iad príomhchúram bhord an Údaráis iad, agus ar an seasamh a ghlac an tÚdarás chun dul i ngleic leis na dúshlán atá romhainn faoi láthair agus na dúshlán a d'fhéadfadh a bheith romhainn.

Rialachas

Chuir an tÚdarás tús arís le líon teoranta cruinnithe boird neamhfhíorúla agus thionóil sé lá foirne lasmuigh den oifig le linn 2021. Is mór an cúnamh ó thaobh cur le cumas an bhoird é an deis bailiú le chéile san fhórsa agus saincheisteanna straitéiseacha a phlé, in ainneoin an dul chun cinn sa teicneolaíocht a d'fhág gur fhéadamar cianchruinnithe a reáchtáil le dhá bhliain anuas. Bhí an méid sin amhlaidh go háirithe toisc nach raibh a lán de chomhaltaí boird an Údaráis tar éis teacht le chéile aghaidh ar aghaidh ó ceapadh iad. Ar an drochuair b'éigean don Údarás filladh ar chianchruinnithe ag deireadh na bliana, ach beidh cruinnithe neamhfhíorúla á reáchtáil againn sa ghnáthchúrsa as seo amach.

Luachanna

Thug an tÚdarás faoi athbhreithniú ar a luachanna i rith na bliana. Mar thoradh ar an bpróiseas sin, a raibh an bord agus an fhoireann páirteach ann agus a rinneadh trí fhóirne agus meithleacha éagsúla, tá trí chroíluch aitheanta againn, mar atá sármhaitheas, neamhspleáchas agus ionracas, agus ceithre iompraíocht lena dtacaítear le gach ceann díobh sin. Tá roinnt athruithe oibríochta curtha i bhfeidhm chun na luachanna a chur san áireamh in obair laethúil an Údaráis. Ba mhaith liom an fhoireann a mholadh as cur go mór leis an bpróiseas tábhachtach sin.

Rioscaí

Le cúpla bliain anuas, tá dhá mhír go mór chun tosaigh i gclár rioscaí an Údaráis, an Breatimeacht ar dtús agus ansin COVID-19. Tugadh aghaidh go héifeachtach ar an gcéad riosca díobh sin agus ní réimse riosca suntasach é don Údarás a thuilleadh, agus cé go bhfuil COVID-19 fós ina ualach mór ar an bpobal, ní raibh tionchar aige ar chumas an Údaráis a shainchúram iomlán reachtúil a chomhlíonadh. D'fhág sé sin go raibh an deis ag an mbord machnamh a dhéanamh ar rioscaí in 2021. Bhí seisiún úsáideach seachtarach ag an mbord ar fhonn riosca, agus thug sé a dhúshlán féin agus dúshlán na bhfeidhmeannach féachaint cé na príomhrioscaí atá le sárú ag Údarás. Mar a léirigh COVID-19, ní féidir gach uile riosca a thuar. Is é an rud is tábhachtaí chun dul i ngleic leis na rioscaí sin ná teacht aniar a chothú san eagraíocht. Trína thionscadal luachanna agus trí ghníomhaíochtaí tacaíochta éagsúla eile an bhoird agus an fheidhmeannais, creideann ÚMICÉ gur éirigh leis é sin a dhéanamh.

Imeacht na Ríochta Aontaithe ón Aontas Eorpach

Leagtar síos forálacha maidir le rialáil iniúchóireachta i ndlí an Aontais Eorpaigh, agus mar sin tá sé rithábhachtach oiliúint chuí a bheith ar gach iniúcháir ar chlár na hÉireann i dtaobh cheanglais rialála agus reachtúla na hÉireann/an Aontais agus taithí chuí a bheith acu sa réimse sin. Toisc nach bhfuil an Ríocht Aontaithe ina ball den Aontas a thuilleadh, shoiléirigh an tÚdarás go bhfuil impleachtaí aige sin i dtaobh líon nach beag iniúcháirí atá bunaithe sa Ríocht Aontaithe agus a bhíodh cláraithe sa dá dhlíne an tráth céanna. I ndeireadh na dála bheartaigh líon mór iniúcháirí a bhí cláraithe sa dá dlíne iad féin a bhaint de chlár na hÉireann toisc nár fhéad siad ceanglais rialála na hÉireann a chomhlíonadh a thuilleadh. Mar thoradh air sin, chinn dhá chomhlacht cuntasíochta aitheanta, Institiúid na gCuntasóirí Cairte i Sasana agus sa Bhreatain Bheag agus Institiúid na gCuntasóirí Cairte in Albain, tarraingt siar ón margadh rialáilte in Éirinn. Ba mhór an cinneadh é sin, ach thuig an tÚdarás an réasúnaíocht a bhí leis. Ba bheag tionchar a bhí aige ar mhargadh na hÉireann i ndáiríre. Leanann an tÚdarás ar aghaidh ag obair lena chomhghleacaithe Eorpacha ar na saincheisteanna a thagann chun cinn maidir le caitheamh leis an Ríocht Aontaithe mar thríú tír faoi reachtaíocht iniúchóireachta an Aontais.



Tar éis próiseas iomaíoch toghcháin, tá áthas orm a thuairisciú go bhfuil ÚMICÉ tar éis dul ar bhord IFIAR, Fóram Idirnáisiúnta na Rialtóirí Neamhspleácha Iniúchóireachta, ar feadh téarma ceithre bliana.

Caidreamh idirnáisiúnta

Luaigh mé sa ráiteas uaim anuraidh go raibh Éire tar éis páirt a ghlacadh i ngrúpa comhairleach CEEFI, an comhlacht Eorpach trína mbíonn rialtóirí an Aontais ag obair le chéile ar mhaithe le cáilíocht na hiniúchóireachta. Bhí ról mór ag foireann ÚMICÉ agus CEEFI ag breathnú arís ar a mhisean agus ag leagan amach pleananna uailmhianacha chun dul i gcomhairle leis an gCoimisiún maidir le tograí i dtaobh athbhreithniú a dhéanamh ar Rialachán agus Treoir Iniúchóireachta an Aontais. Tá tús curtha ag an gCoimisiún freisin le hobair ar an Treoir maidir le Tuairisciú Inbhuanaitheachta Corparáideach, a rachaidh i bhfeidhm ar eisitheoirí agus iniúcháirí atá faoi shainchúram an Údaráis. Tá an tÚdarás ag dul i ngleic leis an tionscnamh seo agus ag tacú leis ar roinnt coistí Eorpacha agus trí thacú leis an Roinn agus í ag breithniú beartais. Cé go bhfuil na

tograí a chuir an Coimisiún chun cinn dírithe go príomha ar nochtuithe cuideachtaí, d'fhéadfaidís cuspóir agus feidhm na hiniúcháireachta reachtúla a athrú ó bhonn, agus tionchar a imirt dá réir ar rialáil iniúcháireachta. Leanfaidh an tÚdarás de bheith ag cur leis na pléití sin lena chinntiú go mbeidh na tograí deiridh éifeachtach i dtaobh aidhmeanna an Choimisiúin a bhaint amach. Déanfaidh sé faireachán agus pleanáil freisin i ndáil le haon tionchar a d'fhéadfaí a imirt ar an Údarás féin.

Tar éis próiseas iomaíoch toghcháin, tá áthas orm a thuairisciú go bhfuil ÚMICÉ tar éis dul ar bhord IFIAR, Fóram Idirnáisiúnta na Rialtóirí Neamhspleácha Iniúcháireachta, ar feadh téarma ceithre bliana. Is aitheantas é sin ar an méid a chuir Éire le hobair IFIAR le roinnt blianta anuas, ag na seisiúin iomlánacha agus ar fud roinnt meithleacha de chuid IFIAR. Fágann an bhallraíocht Bhoird go mbeidh léargas níos fearr ag Éirinn ar bheartas atá á fhorbairt ar an leibhéal domhanda chomh maith le deis níos fearr chun dul i gcomhairle lenár bpiaraí ar fud an domhain. Leagtar béim leis an mballraíocht freisin ar bheartas an Údaráis a fógraíodh roimhe seo maidir le rannpháirtíocht níos mó ar an leibhéal idirnáisiúnta.

Athruithe boird

Chuaigh téarma ceapacháin Mary Burke, ainmní an Bhainc Ceannais, in éag agus d'ainmnigh an Banc Brendan Sheridan ina háit go luath in 2021. Thug Kathleen Redmond, ainmní na gCoimisinéirí Ioncaim, i gcrích a gearrthéarma leis an Údarás agus tháinig Daniel Sinnott ina hionad go luath in 2021 freisin. Ba mhaith liom mo bhuíochas a ghabháil leis an mbeirt acu as fónamh linn, go háirithe Mary a bhí ar an mbord ó 2015 i leith.

Ag teannadh le deireadh na bliana athcheapadh an Príomhfheidhmeannach Kevin Prendergast chuig an Údarás ar feadh tréimhse cúig bliana eile. Thacaigh an bord d'aonghuth lena athcheapachán agus táimid ag tnúth lena théarma úr i gceannas ar fheidhmeannas agus foireann an Údaráis. Agus díreach roimh dheireadh na bliana bhí áthas orm nuair a rinneadh mise a athcheapadh freisin chuig ról an Chathaoirligh, ar feadh tréimhse trí bliana. Is mór an onóir dom fanacht ar Bhord an Údaráis.

Thar ceann an bhoird ba mhaith liom mo bhuíochas a ghabháil leo siúd go léir a d'fhreastail go sármhaith ar an Údarás, agus ba mhaith liom mo bhuíochas féin a ghabháil leo siúd a tháinig ag obair linn le bliain anuas.

Tuairimí scoir

In ainneoin na ndúshlán a bhí le sárú ag an Údarás agus ag cuid mhór den tsochaí le bliain anuas, tá áthas orm dea-fheidhmíocht a thuairisciú arís eile i mbliana. Is gné aitheanta anois den earnáil iniúcháireachta iad tuarascálacha athbhreithnithe dearbhaithe cáilíochta an Údaráis i leith na ngnólachtaí iniúcháireachta, agus aithnítear na caighdeáin a eisiónn sé mar chinn atá ar ardchaighdeán. Mar a léirítear sa chuid eile den tuarascáil seo, táimid fós ag forbairt agus ag feabhsú ár gcur chuige i leith na rialála ar fud réimse an tsainchúraim atá orainn agus muid ag freagairt do chúinsí dúshlánacha a bhíonn seasta ag athrú. An cumas atá ag an Údarás teacht roimh na dúshlán sin, tá sé bunaithe ar an obair

atá déanta aige chun cultúr nuálaíochta a chothú, agus ar an bhfáilte a chuirimid roimh athruithe, chomh maith le sraith luachanna soiléire atá ina dtreoir againn maidir leis an gcaoi a ndéanaimid ár gcuid oibre.

Mar a luaigh mé thuas, bhí sé ag teannadh le deireadh na bliana 2021 sula raibh an deis agam bualadh aghaidh ar aghaidh le go leor de chomhaltaí an bhoird den chéad uair. Bhí an méid a chuir siad le pléití an bhoird ar straitéis, riosca agus rialachas chomh léirsteanach agus chomh géarchúiseach is a bhí riamh, agus comhlíonann an bord ina iomláine, ar bhealach stuama, tacúil an dualgas atá air an feidhmeannas a choinneáil cuntasach. Gach bliain déanann an bord athbhreithniú ar a fheidhmíocht, athbhreithniú a éascaítear go seachtrach, agus tacaítear leis an dearbhú sin san athbhreithniú sin. Ba mhaith liom mo bhuíochas a ghabháil le mo chomhghleacaithe ar fad ar bhord ÚMICÉ as a ndíograis i leith obair an Údaráis i rith na bliana agus as an méid a rannchuidigh siad leis an obair sin. Ba mhaith liom buíochas a ghabháil leis an Tánaiste, leis an Aire Stáit le freagracht as Cur Chun Cinn na Trádála, Cúrsaí Digiteacha agus Rialú Cuideachtaí agus lena gcomhghleacaithe sa Roinn a thacaíonn leis an Údarás trí bhreithniú beartais agus trí chúnadh praiticiúil nuair is gá. Mar is iondúil, gabhaim mo bhuíochas go háirithe leis an bPríomhfheidhmeannach, leis an bhfoireann ceannaireachta a bhíonn i láthair ag cruinnithe boird agus a rannchuidíonn leo, agus le gach duine d'fhoireann ÚMICÉ. Táim ag tnúth le leanúint ar aghaidh ag tacú le hobair an Údaráis le linn mo chéad téarma eile mar Chathaoirleach chun ardchaighdeáin a choinneáil i réim i ngairm na hiniúcháireachta agus na cuntasáíochta.

Martin Sisk
Cathaoirleach
12 Aibreán 2022

ATHBHREITHNIÚ AN PHRÍOMHFHEIDHMEANNAIGH

Réamhrá

Is é cuspóir an athbhreithnithe seo forléargas a thabhairt ar ghníomhaíochtaí an Údaráis in 2021. Feidhmíonn ÚMICÉ de réir clár oibre trí bliana, agus clúdaítear an tréimhse 2020-2022 sa chlár atá i bhfeidhm faoi láthair. Leagann sé amach plean gnó gach bliain i gcomhréir leis an gclár sin. Leagtar amach na freagrachtaí reachtúla atá air in Acht na gCuideachtaí agus i ndlí an Aontais Eorpaigh. Tá sonraí iomlána i gcorp na tuarascála seo faoin gcaoi ar éirigh leis an Údarás na spriocanna a luaitear ina phlean a bhaint amach. Leagtar béim sa tuarascáil ar phríomhéachtaí an Údaráis chomh maith le samplaí den chaoi ar chuir an tÚdarás a chuid oibre i gcrích i rith na bliana. Tugtar athbhreithniú san achoimre uaimse ar na héachtaí sin agus ar obair an Údaráis in 2021.

Príomhghníomhaíochtaí

Tá ÚMICÉ freagrach as caighdeáin iniúchóireachta agus eiticíúla a ghlacadh i leith iniúchóirí reachtúla in Éirinn. Ar an leibhéal domhanda, déanann IAASB caighdeáin iniúchóireachta a dhréachtú, a fhorghnó agus a ghlacadh. Glacann FRC, rialtóir na Ríochta Aontaithe, na caighdeáin sin, agus nuair a mheastar é a bheith iomchuí féadfaidh sé ceanglais bhreise a chur leo. Is é beartas ÚMICÉ caighdeáin na Ríochta Aontaithe a ghlacadh ar a sheal agus ansin measúnú a dhéanamh féachaint an mbaineann tréithe sainiúla le margadh na hÉireann a mbeadh leasú ar chaighdeán na Ríochta Aontaithe ag teastáil ina leith.

I rith 2021 d'eisigh ÚMICÉ sraith nua caighdeán maidir le bainistíocht cáilíochta i gcás gnólachtaí iniúchóireachta. Faoi ISQM (Éire) 1 agus 2 agus ISA (Éire) 220, éileofar ar gach gnólacht iniúchóireachta cur chuige níos réamhghníomhaí a ghlacadh maidir le rannpháirtíocht le cliaint, measúnú riosca agus faireachán leanúnach ar cháilíocht. Beidh feidhm ag na caighdeáin sin ó mhí na Nollag 2022. Ina dteannta sin, ghlac ÚMICÉ ISRE (Éire) 2410 lena soláthraítear treoir maidir le hathbhreithniú ar fhaisnéis airgeadais eatramhach arna heisiúint ag eintitis liostaithe. Ar an leibhéal idirnáisiúnta, tá IAASB ag forbairt caighdeán beartaithe maidir le hiníúchóireacht a dhéanamh ar eintitis nach bhfuil a oiread castachta ag baint leo agus bhí áthas ar ÚMICÉ cruinniú comhchéime Éireannach a óstáil faoi Thograí IAASB, an chéad imeacht for-rochtana poiblí dá leithéid a d'eagraigh IAASB faoin tsaincheist sin.

Áirítear le formhaoirseacht ÚMICÉ ar chomhlachtaí cuntasaióchta na comhlachtaí aitheanta sin ('CCAnna') a bhféadfaidh a gcomhaltaí iarratas a dhéanamh a bheith ar chlár na n-iniúchóirí reachtúla agus liosta níos fairsinge ina gcuimsítear comhlachtaí forordaithe ('CCFanna') a bhfuil a gcuid feidhmeanna dearbhaite cáilíochta agus araíonachta faoi rialú an Údaráis. Toisc nach bhfuil an Ríocht Aontaithe ina ball den Aontas Eorpach a thuilleadh, ní féidir oiliúint agus taithí leanúnach na n-iniúchóirí atá bunaithe sa Ríocht Aontaithe a aithint ar bhonn dhlí agus ceanglais an Aontais, cé gurb ionann i ndáiríre an dá chaighdeán faoi láthair. Dá réir sin roghnaigh an chuid is mó d'iniúchóirí na gcomhlachtaí aitheanta atá bunaithe sa Ríocht Aontaithe go ndéanfaí iad a dhíchláir ó chlár iniúchóireachta na hÉireann. Maidir le comhlachtaí a aithnítear sa dá dhlínse, d'fhág an t-athrú sin gur díródh aird níos mó ar na ceanglais rialála ar leithligh sa dá dhlínse. Dá réir sin,

rinne dhá cheann de na comhlachtaí sin iarratas go ndéanfaí iad a dhí-aithint agus a dhí-fhorordú mar chomhlachtaí rialaithe. Fágann sé sin nach féidir a gcomhaltaí a chlárú sa Stát a thuilleadh mar iniúchóirí, ná nach féidir leo feidhmiú mar leachtaitheoirí, agus tá impleachtaí aige freisin i dtaobh gairmeacha éagsúla a bhfuil ballraíocht i gcomhlacht rialáilte ina gceanglas conarthach ina leith. Rinne an tÚdarás aitheantas ICAEW a chúlghairm i mí Iúil 2021 agus rinne sé aitheantas ICAS a chúlghairm i mí na Nollag 2021.



Toisc nach bhfuil an Ríocht Aontaithe ina ball den Aontas Eorpach a thuilleadh, ní féidir oiliúint agus taithí leanúnach na n-iniúchóirí atá bunaithe sa Ríocht Aontaithe a aithint ar bhonn dhlí agus eanglais an Aontais, cé gurb ionann i ndáiríre an dá chaighdeán faoi láthair

Ag leanúint ar aghaidh ón raon treoirlínte a fógraíodh roimhe seo do na comhlachtaí rialaithe cuntasaióchta, d'eisigh ÚMICÉ treoirlínte breise maidir le hoideachas leanúnach agus feidhmeanna imscrúdaithe agus araíonachta. Leagtar amach sna treoirlínte sin na prionsabail a mbítear ag súil go gcloifidh gach comhlacht leo agus iad i mbun feidhmeanna rialála.

Scrúdaigh an tAonad um Maoirseacht ar Thuairiscíú Airgeadais 37 tuarascáil bhliantúil agus sé thuarascáil leathbhliantúla. Thug 19 n-eisitheoir 86 gealltanais maidir le nochtadh feabhsaithe as seo amach. Ba iad ionstraimí airgeadais an príomhréimse ar bhain na gealltanais leo, ach áiríodh i measc réimsí eile cur i láthair faisnéise, bearta feidhmíochta malartacha a úsáid, nochtadh deighleog oibriúcháin agus tomhas cóirluacha. Ina dteannta sin, bhí an tAonad ag obair lena chomhghleacaithe Eorpacha chun tionchar COVID-19 a shainaithint do thuairisceoirí corparáideacha.

Lean an tÚdarás lena chuid cigireachtaí ar ghnólachtaí a dhéanann iniúchóireacht ar ELPanna, agus rinneadh cigireacht ar ocht ngnólacht in 2021. Chomh maith le scrúdú a dhéanamh ar bheartais ar fud na ngnólachtaí, rinne an tÚdarás athbhreithniú ar shampla de 30 iniúchadh ar ELPanna a rinne na gnólachtaí sin. I mí an Mhárta eisíodh an dara babhta tuarascálacha athbhreithnithe maidir le dearbhú cáilíochta. Léiríonn torthaí na gcigireachtaí sin treocht leanúnach chun feabhsais maidir le cáilíocht na n-iniúchtaí a athbhreithníodh.

Ó d'fhoilsigh an tÚdarás torthaí a chigireachtaí ar dtús, tá méadú ó 71% go 93% tagtha ar líon na n-iniúchtaí ar tugadh grád 1 nó 2 dóibh (rud a chiallaíonn go bhfuil an t-iniúchadh ar dhea-chaighdeán). Níor tugadh grád 4 (an grád is ísle) d'aon iniúchadh a luadh i dtuarascálacha foilsithe an Údaráis – sé sin ní raibh aon chás ann ina raibh gá le feabhas mór. D'óstáil ÚMICÉ an dara himeacht faisnéise dá chuid do choistí iniúcháireachta i rith na bliana, inar sholáthair raon cainteoirí léargas do chathaoirligh agus do chomhaltaí coistí iniúcháireachta. Ar an leibhéal idirnáisiúnta ba mhór an onóir do ÚMICÉ gur toghadh é chuig bord IFIAR, an fóram idirnáisiúnta do rialtóirí iniúchta neamhspleácha. Tacaíonn an tÚdarás lena chomhghleacaithe Eorpacha agus idirnáisiúnta chun cur le cáilíocht na rialála ar iniúchtaí trí rannpháirtíocht ghníomhach i bhfóraim idirnáisiúnta nuair is iomchuí. Leanadh ar aghaidh leis na fostaíochtaí sin go léir i bhformáid fhíorúil le linn 2021. Ní mór a rá, áfach, nach iontach an réiteach é sin agus go laghdaítear fiúntas na fostaíochta sin dá bharr. Táthar ag súil go bhféadfar tús a chur le himeachtaí neamhfhíorúla arís in 2022. Bhí an rannpháirtíocht ar leibhéal na hEorpa dírithe ar na leasuithe a bheartaítear a dhéanamh ar an Rialachán agus an Treoir Iniúcháireachta agus freisin ar na tograí nua le haghaidh Treoir maidir le Tuairiscí Inbhuanaitheachta Corparáideach. Bíonn ÚMICÉ ag obair lena chomhghleacaithe agus leis an gCoimisiún Eorpach chun réiteach a aimsiú ar roinnt de na dúshláin iomadúla a bheidh le sárú de bharr na dtograí uaillmhianacha sin.

Ó thaobh an fhorfheidhmithe de, rinne an tÚdarás dhá chomhaontú socraíochta in 2021. I gcás ceann acu sin, rinneadh é le comhpháirtí iniúcháireachta in Mazars maidir le hiniúchadh ar an nGníomhaireacht Náisiúnta um Bainistíocht Sócmhainní i leith na bliana dar chríoch an 31 Nollaig 2016. Le Cuntasóirí Cairte Éireann a bhí an dara socrú agus bhain sé leis an gcaoi ar fheidhmíodar a gcuid nósanna imeachta imscrúdaithe agus araíonachta i gcás ar leith. Tá roinnt fiosrúchán agus imscrúduithe fós idir lámha ag an Údarás ag deireadh na bliana.

Rinne an tÚdarás a fheidhm airgeadais agus riaracháin a athstruchtúrú agus a leathnú in 2021, nuair a bhunaigh sé aonad feidhme seirbhíse corparáidí nua atá dírithe go sonrath ar fheidhmeanna acmhainní daonna. Próiseas is ea é sin a bhí de dhíth le fada an lá, i bhfianaise méadú mór a bheith tagtha ar an Údarás le blianta beaga anuas. Chomh maith leis na ceanglais iomadúla reachtúla agus rialála a chomhlíonadh atá air mar ghníomhaireacht phoiblí agus mar chuideachta, rinne an tÚdarás athbhreithniú freisin ar an gcaoi a dtacaíonn sé leis na baill foirne maidir lena bhfeidhmíocht agus lena bhforbairt, agus bhí ceangal idir sin agus an tionscadal um athbhreithniú luachanna ar tugadh faoi le tacaíocht ón aonad um Fhorbairt Eagraíochta. Ina theannta sin, thug an tÚdarás a straitéis nuálaíochta cothrom le dáta i gcomhthéacs straitéis nuálaíochta na hearnála poiblí, ach tugadh aird chuifreisin ar shainchúram agus raon feidhme obair an Údaráis. Tá an straitéis nasctha anois le clár oibre trí bliana an Údaráis. Leanann an tÚdarás ag cur lena láithreach ar na meáin shóisialta: tá rannpháirtíocht níos mó aige ar LinkedIn agus bhunaigh sé cainéal nua YouTube. Is bealaí breise iadsan go léir ina bhféadfaidh an tÚdarás aird a dhíriú ar an obair a dhéanann sé maidir le cáilíocht iniúcháireachta a chur chun cinn.

Agus é ag freagairt do na dúshláin agus ag tapú na ndeiseanna a tháinig as COVID-19 chun machnamh a dhéanamh ar ár mbeartais oibre, chuir an tÚdarás beartas maidir le hobair sholúbtha i bhfeidhm in 2021. Aithnítear sa bheartas taithí an Údaráis agus é fós ag feidhmiú ag leibhéal an-ard i dtimpeallacht chianoibre, agus féachtar ann leis na buntáistí a aithníodh a choinneáil ar bun ar mhaithe leis an bhfoireann agus leis an Údarás araon.

Tuairimí scoir

Tugadh achoimre anseo ar obair an Údaráis le linn 2021. Tá níos mó sonraí sa chuid eile den tuarascáil seo faoin gcaoi ar chomhlíon an tÚdarás a shainordú, lena n-áirítear sonraí ar conas a bhain gach cuid den Údarás amach na spriocanna a leagadh síos faoin bplean gnó bliantúil. Léirítear leis sin an raon an-leathan gníomhaíochtaí, idir ghníomhaíochtaí lárnacha agus tacaíochta, a dhéanann foireann an Údaráis gach uile bhliain. Leanadh leis an obair sin i bhformáid lánfhíorúil in 2021, rud a raibh a dhúshlán féin ag baint leis. Rinne an tÚdarás obair mhór chun tacú lena bhaill foirne, tríd an tionscadal luachanna, trí sheisiúin fhíorúla oiliúna, agus trí choinneáil air ag soláthar deiseanna dúshlánacha, fiúntacha dá bhaill foirne trí obair laethúil an Údaráis. Ina seál féin, cuireann ár mbaill foirne seirbhís den scoth ar fáil don Údarás ar mhaithe leis an bpobal i gcoitinne a bhíonn ag brath ar ghairm na hiniúcháireachta agus na cuntasaióchta. Ba mhaith liom mo bhuíochas a ghabháil leo as an méid sin a bhaint amach arís eile tráth ar cuireadh ár ndúshlán ar bhealach nach bhfacthas riamh roimhe seo. Chomh maith leis sin, ba mhaith liom mo bhuíochas a ghabháil leis an mbord as a dtacaíocht le linn 2021. Is pribhléid fós é an fhoireann feidhmiúcháin agus foireann an Údaráis a threorú, agus táim ag tnúth leis na dúshláin atá amach romhainn.

Kevin Prendergast
Príomhfeidhmeannach
12 Aibreán 2022